

Sulat Tun Ta Mga Hebreo

Una Basan

Tun ta Bibliya, si Abram na una ngadan i Abraham tō una igngadanan Hebreo. (Ahaán tō Genesis 14:13.) Igngadanan pagsik tō mga rubbad din na Hebreo. Si Juda tō apù abul i Abraham, asta igngadanan Judio tō mga rubbad i Juda. Tō igsulat kani tun ta mga Hebreo, iring na ándà kassaan katō ngadan Judio asta Hebreo.

Ándà kasóddóri ka sadan tō igsulat kani. Igpapid ni sulat tun ta mga Judio na igpamaké ki Jesu-Cristo. Su igsarig dan asta igbánnal dan ka Manama, iringasaan dan katō duma mga Judio na ándà pamaké ki Jesus. Igbuyas-buyas dan asta igirrayatan dan ébô sumungkù dan summarig ki Jesus asta lumónód dan tun ta tapé ágkémun dan. Duwán mga igpamaké na iglónód dán tun ta tapé ágkémun dan su ándà dan ikatiis katō kérreyat. Purisu igpapid ni sulat tun kandan ébô pabákkárrán tō pusung dan asta ébô masarig tō kapamaké dan.

Nit sulat, igulit na si Jesus tō bánnal Batà ka Manama, asta tuu mallayat sikandin ka tandingán ki Moises asta katō mga panaligan ka Manama. Sikandin tō Mesiyas na gimanán katō mga Judio. Igulit pagsik na tuu ágkailanganán tō kamatayan i Jesus ébô matábbus dan tikud tun ta salà. Si Jesus tō Taratapid tun ta Manama para katō mga manubù, asta ándà palang ássa, su si Jesus dád gó tō Taratapid.

Igkagi tō Manama ukit katō Batà din

¹ Sayyan, ukit katō mga propeta ka Manama igkagi sikandin tun ta mga kamónaan ta na Judio. Marapung asta ássa-ássa tō mga kapókit ka kakagi din kandan. ² Asal áknganni, ássa dán tō iglumu ka Manama, su ukit katō kandin Batà igkagi tō Manama áknita. Ukit katō Batà din igimu tō Manama katō langun-langun, asta igsalin ka Manama sikandin ébô tumigatun katō langun. ³ Ukit pagsik kandin, ágkitanán tō bánnal kallayatan ka Manama, asta sikandin tō ágkitaan ta katō ágkémun ka Manama. Sikandin tō gawid katō langun nit banuwa ukit katō matulus kagi din. Pángnga inaté sikandin ébô linisan ki tikud tun ta mga salà, igulì sikandin tun ta langit, asta igunsad dadan tun ta kawanan katō matulus Manama ébô mangulu duma kandin.

Tō Batà ka Manama mallayat pa ka tandingán katō mga panaligan

⁴ Tō igunsad tō Batà din, igpasóddór ka Manama na tuu pa mallayat tō Batà din ka tandingán katō langun panaligan. Mallayat pa pagsik tō ngadan na igbággé ka Manama kandin ka tandingán katō ngadan ka mga panaligan din. ⁵ Ándà palang panaligan ka Manama na igkagiyan din na iring kani igkagi din katō Batà din, na mà din,

“Sikuna tō Batà ku,

asta pasóddórán ku na sakán tō Ámmà nu.”*
Asta ándà pagsik kagi tō Manama tingód katō mga panaligan na,

“Sakán tō Ámmà din,

* ^{1:5} 1:5a Salmo 2:7.

asta sikandin tō Batà ku.”†

6 Tō masig dán pasadunán ka Manama tō Batà din nit banuwa ébô imun sikandin na panganayan batà tun ta mga ágpampamaké, igkagi pagsik tō Manama, na mà din,

“Kailangan pangadapán sikandin katô langun panaligan ku.”‡

7 Na, tingód katô mga panaligan, igkagi tō Manama, na mà din,

“Mga ágsuguánnán ku tō mga panaligan,
asta mému na imun ku sikandan na iring na karamag asta iring na apuy.”§

8 Asal tuu pa madigár tō igkagi ka Manama tingód katô Batà din, su igkagi sikandin, na mà din,

“Sikuna na Manama tō mangulu ka ándà ágtamanán,
asta nángngà tō pagpangulu nu.

9 Ágginawa ka katô mga áglumu ka nángngà,
asta ágkaringasa ka katô mga áglumu ka madat.
Purisu igsalin ka katô Manama na áknikó Manama,
asta ighbággayan ka katô kadawayan na sobra pa ka tandingán katô kadawayan na ighbágge tun ta mga kadumaan nu.”*

10 Asta igkagi tō Manama tun ta Batà din,
“Áglangngagán, sikuna tō igimu kani banuwa tun ta katigkanayan,
asta sikuna tō igimu katô langun tun ta langit.

11 Mandà ni banuwa asta tō langit,
asal mugtuk ka ka ándà ágtamanán.

† **1:5** 1:5b 2 Samuel 7:14. ‡ **1:6** 1:6 Deuteronomio 32:43. § **1:7**

1:7 Salmo 104:4. * **1:9** 1:8-9 Salmo 45:6-7.

Kadattan ni langun iring na umpak.

¹² Iring na tapé umpak, lulunán nu tō banuwa asta
tō langit,

asta sékót nu bullasan.
Asal sikuna tō dì gó mapalin,

su ándà palang ágtamanán nu.”†

¹³ Ándà palang panaligan na igkagiyán ka Man-
ama kani,

“Unsad ka nit dadan ta kawanan ku

sippang ka patalun ku tō mga usig nu.”‡

¹⁴ Tō mga panaligan tō ágsuguánnán dád ka Man-
ama ébô tumabang katô mga tábbusán din.

2

Madigár tō katábbusan

¹ Purisu su mallayat tō Batà ka Manama, kailan-
gan tuu ki mánnal katô kabánnalan na igtinurù
áknita agó makasuwe ki. ² Ágkasarigan tō mga
sugù ka Manama na igulit ka mga panaligan,*
asta igsupakan tō langun na iglapas ó ándà bánnal
katô mga sugù. ³ Purisu sikita gó pagsik tō
supakan ka élléyan ta tō kagi din tingód katô
katábbusan. Áglangngagán tō una igpasóddór na
duwán katábbusan, asta tō mga igdinág kandin
igpasóddór áknita na bánnal gó ni. ⁴ Ukit katô mga
kasalábbuan asta matulus mga áglumun din, ig-
pasóddór pagsik ka Manama na ágkasarigan tō kagi
din na igulit dan. Tikud tun ta kandin kakalyag,

† **1:12** 1:10-12 Salmo 102:25-27. ‡ **1:13** 1:13 Salmo 110:1. * **2:2**

2:2 Igbággé ka Manama tō mga sugù tun ta mga panaligan din, asta
sikandan tō igbággé katô mga sugù ki Moises. Ahaán tō Lumu 7:53;
Galacia 3:19.

igbággé din tun kandan tō mga gasa katô Ugis Espiritu.

Igpamanubù tō Taratábbus ta

⁵ Ánnà mga panaligan ka Manama tō igsalin din ébô mangulu katô mantu banuwa tun ta tapuri álló, ni banuwa na igulit kud ákniyu, ⁶ su duwán igsulat tun ta kagi ka Manama sayyan, na mà din, “Manama, agad mga manubù ké dát,

asal igpanámdám ké ikuna!

Agad mga manubù ké dát,

asal ágdóppónan ké gó ikuna!

⁷ Igimu nu tō mga manubù na mabbabà ka tandingán katô mga panaligan tun ta mabbabà timpo.

Igbággayan ké ikuna ka durung asta bantug,

⁸ su igpapangulu ké ikuna tun ta langun.”†

Agad igsulat na igpapangulu ki ka Manama tun ta langun, isóddoran ta na ándà palang iliyasan na ándà din papanguluwi, agad isóddoran ta na ándà ki pa pangulu katô langun áknganni. ⁹ Asal isóddoran ta na si Jesus tō inému mabbabà dát ka tandingán katô mga panaligan ka Manama tun ta mabbabà timpo. Tingód katô kamatayan din, igimu dán ka Manama sikandin na ágkadurung asta ágkabantug su igirrayatan asta inaté sikandin tun ta krus para áknita. Ukit katô kédu ka Manama, inókitan i Cristo tō kamatayan na bullas áknita langun. ¹⁰ Igimu ka Manama tō langun-langun, asta ni langun igimu para pabantugán sikandin. Purisu nángngà tō igimu ka Manama ébô piddán din tō marapung mga gabatà din tun ta séllaán

† **2:8** 2:6-8 Salmo 8:4-6.

katô pagpangulu din. Ukit katô kahirapan na igtiiis i Jesus, inému sikandin na nángngà Pangulu ébô makatábbus áknita.

¹¹ Su si Jesus tô iglinis katô mga salà ta, magunawa tô Ámmà din asta Ámmà ta. Purisu dì mayyà si Jesus kumagi na sikita tô mga kataladi din. ¹² Purisu igkagi sikandin, na mà din, “Ámmà, igulitta tingód áknikó tun ta mga kataladi ku.

Durungán ku sikuna ukit katô kanta ku tun ta tubang dan.”‡

¹³ Igkagi pagsik sikandin,
“Manama tô sarigan ku.”§
Asta igkagi pagsik sikandin,
“Kannunna gó asta tô mga gabatà ka Manama na igsarig din kanak.”*

¹⁴ Na, su ágkamaté tô lawa katô langun ta na mga gabatà katô Manama, si Jesus pagsik igpananubù ébô ukit katô kamatayan din, talun din si Maibuyan na pangulu ka kamatayan, ¹⁵ asta ébô paluwaán din tô mga inalayun inallang ka máddang ka kamatayan. ¹⁶ Isóddóran ta na ánnà mga panaligan tô igtabangan din, asal tô langun rubbad i Abraham tô igtabangan din. ¹⁷ Purisu inému gó sikandin iring áknita na mga kataladi din ébô makatabang áknita. Inému gó sikandin iring áknita ébô imun sikandin Pangulu na Parì na duwán kédu din asta ágkasarigan tun ta saruhan ka Manama, asta ébô pasinsiyaan tô mga salà ta. ¹⁸ Su igdungguan sikandin ka kahirapan asta ikatiis

‡ ^{2:12} 2:12 Salmo 22:22. § ^{2:13} 2:13a Isaías 8:17. * ^{2:13} 2:13b Isaías 8:18.

sikandin katô pagtintal i Maibuyan, makatabang sikandin katô langun na tintalán i Maibuyan.

3

Mallayat pa si Jesus ka tandingán ki Moises

¹ Purisu mga kataladi* na sakup ka Manama asta igsalin din, panámdám kó tingód ki Jesus na gulit-ulitán ta. Sikandin tô igpapid ka Manama dini áknita ébô imun Pangulu na Paríta. ² Ágkasarigan sikandin su inalayun sikandin ighbánnal ka Manama na igpapid kandin. Purisu iring sikandin ki Moises sayyan na inalayun ighbánnal ka Manama tô igpid sikandin katô mga kamónaan ta na iring na pamilya ka Manama. ³ Asal tuu pa ágkabantug si Jesus ka tandingán ki Moises, su tuu pa ágkabantug tô gimu ka balé ka tandingán katô balé na gimun din. ⁴ Atin ka duwán balé, duwán igimu katô balé, asal Manama tô igimu katô langun-langun. ⁵ Si Moises tô ágsuguánnán ka Manama tô igpid sikandin katô langun kadumaan din. Su ágkasarigan si Moises, isóddórán ta na ágkasarigan tô igkagi din tingód katô gulitán tun ta dumunggù álló. ⁶ Asal si Cristo na Batà ka Manama tô ágkasarigan ágpid katô langun ta na pamilya ka Manama. Pasóddórán ta na igpasakup ki tun ta pamilya din ka manayun ki ágsarig kandin asta gimanán ta tô igtandô din.

Madigár tô igpataganà para katô mga gabatà ka Manama

* **3:1** 3:1 Mga kataladi na sakup ka Manama, ó ugís mga kataladi.

- 7** Purisu kailangan paminággán ta tō igkagi katô Ugis Espiritu, na mà din,
“Agad ni álló ni, ka duminág kó katô kagi din,
8 yakó géllé asta ágpatággas katô ulu yu.
Yakó giring katô mga kamónaan yu tun ta disyerto sayyan na igkinnaman dan katô Manama.
- 9** Agad igkita dan tō mga kasalábbuan na igimu ku dalám ka kappatan (40) ámmé,
asal igkinnam dan pô gó kanak ka ánda tō sippangan katô kapallayat ku ka ginawa tingód katô madat na áglumun dan.
- 10** Purisu isókówa gó kandan,
asta igkagiya tingód kandan,
‘Inalayun dan ágsuwé tikud dini kanak.
Dì dan gó ágtuman katô igtinurù ku kandan.’
- 11** Purisu isókówa asta igsapà a,
‘Dì kud sikandan póddóán tun ta paginawaanán na iga pataganà ku.’ ”†
- 12** Purisu mga kataladi, banté kó agó tun ta ákniyu pusung duwán madat asta dì ágbánnal,
asta makasuwe kó tikud tun ta manté Manama.
- 13** Kailangan papabákkárré kó tun ta kapamaké yu kada álló róggun na duwán pa álló ébô dì kumatággas tō ulu yu ukit katô kalimbung ka salà.
- 14** Atin ágkasarigan ki asta manayun ki ágpamaké ki Cristo sippang tun ta ágtamanán iring katô katigkanayan ka kapamaké ta, tanggapán ta tō langun na bággén tun ta mga sakup i Cristo.
- 15** Yakó ágkalingó kani kagi ka Manama na igsulat,
“Ni álló ni, ka duminág kó katô kagi ka Manama,

† **3:11** 3:7-11 Salmo 95:7-11.

yakó géllé asta ágpatággas katô ulu yu
iring katô iglumu katô mga kamónaan yu.”‡

16 Tô mga manubù sayyan na igdinág ka kagi ka Manama asal igéllé kandin, tô gó tô igtákkás ki Moises tô igiwà dan tikud tun ta Ehipto.

17 Sikandan tô isókówan ka Manama sippang ka kappatan (40) ámmé su inalayun dan áglumu ka salà, asta inaté tô langun dan tun ta disyerto.

18 Sikandan tô igsapaan ka Manama na dì dán pòddóán duma kandin tun ta paginawaanan na igpataganà din, su igéllé dan kandin. **19** Purisu isóddóran ta na ándà dan ikóddô duma katô Manama, su ándà dan bánnal kandin.

4

1 Na, duwán pa katumanan katô tandô ka Manama su mému ki móddô duma kandin tun ta paginawaanan na igpataganà din. Purisu kailangan manté ki agó ka dumunggù tô álló ka karuud, duwán musing áknita na dì pòddóán duma kandin.

2 Igulitan kid ka madigár gulitán na magunawa katô igulit tun ta mga kamónaan ta sayyan. Agad igdinág dan katô madigár gulitán, asal ándà igpulus dan, su ándà dan pamaké. **3** Asal sikita na ágpampamaké tô pòddóán ka Manama tun ta paginawaanan na igpataganà din, su igkagi tô Manama tingód katô mga kamónaan ta sayyan, na mà din,

“Isókówa asta igsapà a:

Dì ku sikandan pòddóán duma kanak

tun ta paginawaanan na igpataganà ku.”*

‡ **3:15** 3:15 Salmo 95:7-8. * **4:3** 4:3 Salmo 95:11.

Duwán banuwa na igpataganà din dán, su igóddóan din tikud tun ta katigkanayan kani banuwa. ⁴ Mà katô kagi ka Manama tingód katô ikapittu álló ka kému din kani banuwa, “Igpaginawa tô Manama ka ikapittu álló, su ipángnga dán tô langun iglumu din.”†

⁵ Asal igkagi tô Manama tingód katô mga kamónaan ta na ándà bánnal kandin, na mà din, “Dì ku sikandan póddóán duma kanak tun ta paginawaanan na igpataganà ku.”‡

⁶ Agad igdinág dan gó tô madigár gulitán, asal ándà dan póddói ka Manama duma kandin, su ándà dan bánnal kandin. Purisu duwán pa duma mga manubù na póddóán din duma kandin. ⁷ Isóddóran ta na nángngà tô áglumun ka Manama, su agad marapung tô ámmé na iglabé, asal ukit kani igsulat i David, igpasóddór ka Manama na duwán ássa álló, agad áknganni, na póddóán din tô mga manubù duma kandin. Tô gó é kóbadan kani kagi din na taganà ku igulit, na mà din,

“Agad ni álló ni, ka duminág kó katô kagi ka Manama,

yakó géllé asta ágpatággas katô ulu yu.”§

⁸ Tô igpid si Josue katô mga kamónaan ta sayyan, ánnà tô é lugar na igpataganà ka Manama para paginawaan dan, su igkagi tô Manama na duwán pa ássa álló na póddóán din tô mga manubù duma kandin. ⁹ Purisu isóddóran ta na duwán pa paginawaanan na igpataganà ka Manama ébô makapaginawa tô langun ta na mga sakup din, iring katô kapaginawa din sayyan tun ta ikapittu

† **4:4** 4:4 Genesis 2:2. ‡ **4:5** 4:5 Salmo 95:11. § **4:7** 4:7 Salmo 95:7-8.

álló. ¹⁰ Tô manubù na maginawa duma kandin, ipángnga dán tô áglumun din, iring katô kapaginawa ka Manama pángnga katô kému din kani banuwa. ¹¹ Purisu su duwán paginawaanan na igpataganà ka Manama áknita, kailangan mággárággar ki gó ébô makahu ki tun ta paginawaanan, su atin ka dì ki mánnal, dì ki makahu tun ta paginawaanan, iring katô mga kamónaan ta sayyan.

¹² Tô kagi ka Manama duwán manté katulusan. Tuu pa matam ka tandingán katô kampilan na duwán duwa sarab. Tô kagi ka Manama gunsáb tun ta kadalámmánna katô gimukud asta espiritu, asta sippang tun ta laluwadan asta uták katô tullan. Ágpasóddórán tô ágpanámdám ta asta tô kakalyag ta. ¹³ Ándà palang manubù na makallás tun ta Manama, su ágkitanán din tô langun, asta matayyó tun ta kasállág din. Sikandin gó tô kailangan tubangán ta.

Si Jesus tô Pangulu na Parì ta

¹⁴ Duwán mallayat Pangulu na Parì ta na igsadun dán tun datas ta langit, asta sikandin si Jesus na Batà ka Manama. Purisu kailangan manayun ki sumarig kandin na gulit-ulitán ta, ¹⁵ su tô Pangulu na Parì ta ikasóddór katô kalómétan ta. Inókitan din tô langun pagtintal na gukitan ta, asal ándà palang salà na ilumu din. ¹⁶ Su duwán Pangulu na Parì ta, dì ki kayyaan ka padani ki tun ta Manama na inalayun ágtabang ébô médu asta tumabang sikandin áknita ka duwán ágkailanganán ta.

5

¹ Tô manubù na imun pangulu na parì, salinán sikandin ébô tumubang tun ta Manama tingód katô duma mga manubù. Ágtanggap sikandin katô mga ágbággén dan tun ta Manama, asta katô mga mannanap na ágmatayan tingód katô salà dan. ² Tô pangulu na parì sékót pakasalà iring áknita. Purisu makagpát sikandin katô duma manubù na ágkapid na makasalà. ³ Su pakasalà sikandin, kailangan duwán mannanap na matayan din tingód katô kandin salà, iring na kamaté din ka mannanap tingód katô salà ka duma mga manubù.

⁴ Dì mému ka salinán ka manubù tô sarili din ébô imun pangulu na parì, su kailangan tawarán sikandin ka Manama, iring na katawar ka Manama ki Aaron sayyan. ⁵ Agad si Cristo, ándà sikandin pabantug katô sarili din ébô imun Pangulu na Parì ta, asal igsalin sikandin ka Manama na igkagi kandin, na mà din,

“Sikuna tô Batà ku,

asta pasóddórán ku na sakán tô Ámmà nu.”*

⁶ Igkagi pagsik tô Manama tun kandin,
“Sikuna tô Pangulu na Parì sippang ka ándà ágtamanán,

iring katô kaparì i Melkisedec sayyan.”†

⁷ Róggun na igóddô si Jesus nit banuwa, inalayun sikandin igdasal tun ta Ámmà din. Duwán álló igul-laó sikandin asta igsággó, su Manama tô makatabang kandin ébô dì maté. Igpaminág tô Manama ki Jesus su inalayun sikandin igbánnal. ⁸ Agad Batà ka Manama si Jesus, asal ukit katô katiis

* ^{5:5} 5:5 Salmo 2:7. † ^{5:6} 5:6 Salmo 110:4.

din ka kahirapan, ikakatig sikandin na ágtuman ka kakalyag katô Ámmà din. ⁹ Inému sikandin na ágtikudan ka katábbusan na ándà ágtamanán para katô langun na ágbánnal kandin, su nángngà tō katiis din katô langun. ¹⁰ Tô gó igimu sikandin ka Manama Pangulu na Parì, iring katô kaparì i Melkisedec sayyan.

Yakó ágsódô ágpamaké

¹¹ Na, tingód katô kaparì i Melkisedec asta i Jesus, duwán pa pád dakál sulatán ku tun ákniyu, asal mahirap tō kapénagpát ku ákniyu, su inandà dán tō kakalyag yu na maminág. ¹² Su idugé kód igpamaké, makatinurù kód pád ka duma mga manubù. Asal sippang áknganni kailangan duwán tuminurù gó puman ákniyu katô tagnà mga ágtinuruán tikud tun ta kagi ka Manama. Iring kó na délák batà na ginám pa ka gatas asta dì pa pakakan. ¹³ Iring na batà na ginám pa ka gatas tō manubù na ándà ikasóddór katô kagi ka Manama tingód katô nángngà lumun tun ta saruwan ka Manama. ¹⁴ Asal makakan tō igdakál dán manubù, su inalayun sikandin pakasóddór ka kapókit ébô ássan din tō madigár asta tō madat.

6

¹ Purisu tumanan kid mistudio katô mga kabánnalan na sékót ágkagpáttan tingód ki Cristo, asta manayun ki baling mistudio katô ágtinuruán na makapabákkár katô kapamaké ta. Dì ta lónódan tō mga kabánnalan na isóddóran tad tingód katô karákkád ta katô mga linumuwan na ándà ágpulusán asta tingód katô kapamaké ta katô

Manama. ² Dì mému ka inalayun ta lónódan tō kéring ta tingód katô kapabunyag, tingód katô kadappán ka manubù ébô tumanggap ka Ugis Espiritu, tingód katô kantayan puman tun ta tapuri álló, asta tingód katô supak ka Manama ka ándà ágtamanán. ³ Madigár baling ka manayun ki tun ta mga kabánnalan na tuu pa madalám, asta tō gó é lumun ta ka mému tun ta Manama.

⁴⁻⁶ Manayun ki ébô dì ki tumayyug katô Manama, su atin ka tumayyug tō mga manubù ka Manama na taganà dan inayadan, dì dan puman makarakkád. Agad taganà dan isóddóran tō kabánnalan, agad duwán igbággé ka Manama kandan, agad duwán iglumu katô Ugis Espiritu tun kandan, agad isóddóran dan na madigár tō kagi tikud tun ta Manama asta igkita dan tō mga kasalábbuan iring katô malumu tun ta tapuri álló, asal ka tumayyug dan ka Manama na taganà dan inayadan, dì dan puman makarakkád. Iring dan katô mga manubù na igpansal katô Batà ka Manama tun ta krus, su ágpayayyaán dan sikandin tun ta duma mga manubù.

⁷ Atin ka inalayun gudanan tō tanà asta ágtubuan ka mga pamulanán, duwán makangé katô mga igpapamula, asta duwán pulusán tikud tun ta Manama. ⁸ Asal tō tanà na ágtubuan dák ka mga dugin asta mga sigbát, ándà ágpulusán. Tō gó tō masig dán dungguan ka supak ka Manama asta góbbón.

⁹ Mga ágginawaan ku, agad tō gó é igsulat ku ákniyu, asal isóddóran ku na tuu pa madigár tō tamanán yu na igtábbus ka Manama. ¹⁰ Nángngà

tô karduud ka Manama, asta dì din kalingawan tô madigár linumuwan yu asta ô ginawa yu kandin na igapakita yu ukit katô katabang yu katô mga sakup ka Manama, iring katô áglumun yu sippang áknganni. ¹¹ Kakalyag ku na manayun kó gumi-nawa sippang ka lumónód ô Áglangngagán ébô tanggapán yu ô langun madigár na gimanan yu. ¹² Yakó ágpatukuk-tukuk, asal kailangan miring kó katô duma mga manubù na iga-pamaké ka Manama asta mallayat é ginawa dan sippang ka igtanggap dan katô igtandô din kandan.

Matuman ô tandô ka Manama

¹³ Na, ô igtandô ô Manama ki Abraham sayyan, kakalyag din na makasóddór si Abraham na matuman ô tandô din. Purisu iggamit ka Manama ô kandin ngadan, su ándà palang ngadan na tuu pa mallayat ka tandingán katô kandin ngadan.

¹⁴ Ikgagi sikandin ki Abraham, na mà din, “Tumandô a na madigár ô bággén ku áknikó, su imun ku na tuu marapung ô mga rubbad nu.”*

¹⁵ Purisu itanggap i Abraham ô igtandô ka Manama kandin, su igpanayun sikandin gangat katô katumanan.

¹⁶ Atin ka ágsapà ô mga manubù, gamítán dan ô ngadan na tuu pa mallayat ka tandingán katô kandan ngadan. Atin ka ô gó é lumun dan, mánnal ô duma mga manubù, asta ándà dán apulan. ¹⁷ Ô Manama pagsik igsapà ukit katô kandin ngadan, su kakalyag din na makasóddór ô igtandóan din na dì mapalin ô tandô. ¹⁸ Dì gó mapalin ni duwa: Atin ka ágtandô ô Manama, dì ágbulaló sikandin.

* **6:14** 6:13-14 Ahaán ô Genesis 22:16-17.

Atin ka ágsapà sikandin, dì ágbulaló. Purisu kumabákkár tò pusung ka langun ta na igaput tun kandin, asta inalayun ta gimanan tò igtandô din áknita. ¹⁹⁻²⁰ Su matuman tò tandô ka Manama, masarig tò gimanan ta iring na masarig angkla ka barko. Si Jesus tò iring na pangulu na parì na igukit tun ta tabir katô tángngaan ka templo, su ikóna dán si Jesus tun datas ta langit ébô tumubang sikandin tun ta Manama tingód áknita. Tumanggap ki gó katô igtandô din, su si Jesus igimu na Pangulu na Parì ta ka ándà ágtamanán, iring katô kaparì i Melkisedec sayyan.

7

Si Melkisedec

¹ Na, si Melkisedec tò harì tun ta lunsud ka Salim, asta sikandin tò pangulu na parì ka mga ágpamaké ka Manama na Tuu Mallayat. Tô igulì si Abraham tikud tun ta kapanalu din katô mga harì na igusig kandin, igsumar si Melkisedec kandin, asta igdasal sikandin para ki Abraham ébô bággayan sikandin ka Manama ka madigár. ² Si Melkisedec tò ighbággayan i Abraham ka ikasapulù katô langun na ikangé din. Tô kóbadan katô ngadan i Melkisedec, Nángngà Harì na Ágpangulu. Ágtawarán pagsik sikandin na Harì ka Salim. Tô kóbadan ka kagi Salim, kasunayan.* ³ Tun ta kagi ka Manama na igsulat, ándà sulati ka sadan tò ámmà asta innà din. Ándà ta kasóddóri ka sadan tò mga kamónaan din. Ándà sulati tò tingód katô kapamasusu din asta tò tingód katô kamatayan

* ^{7:2} 7:1-2 Ahaán tò Genesis 14:17-20.

din. Iring sikandin katô Batà ka Manama na ándà ágtamanán katô kaparì din.

⁴ Na, isóddóran ta na tuu ágrespetowan si Melkisedec! su sikandin tô igbággayan ka kamónaan ta na si Abraham ka ikasapulù katô mga ikangé din. ⁵ Tingód katô mga sugù, tô mga pangulu na parì na mga rubbad i Levi, ágtanggap dan ka ikasapulù tikud tun ta mga kataladi dan na mga rubbad i Abraham. ⁶ Asal tuu pa ágrespetowan si Melkisedec, su agad ánnà rubbad i Levi, asal sikandin tô igbággayan i Abraham ka ikasapulù katô ikangé din. Tuu pa ágrespetowan si Melkisedec ka tandingán ki Abraham, su sikandin tô igdasal tingód ki Abraham na taganà igtandóan ka Manama, ⁷ su isóddóran ta na tô manubù na dumasał para katô duma, tô gó é tuu ágrespetowan ka tandingán katô manubù na dasalan din, asta si Melkisedec tô igdasal para ki Abraham.

⁸ Na, tô mga pangulu na parì na ágtanggap ka ikasapulù, ágkamaté dan. Asal tuu pa ágrespetowan si Melkisedec, su ándà uliti tô tingód katô kamatayan din, iring na ándà ágtamanán katô kaparì din.

⁹ Tuu pa ágrespetowan si Melkisedec, su agad si Levi tô igtanggap katô ikasapulù, asal iring na igbággé din tô ikasapulù tun ki Melkisedec ukit ki Abraham, ¹⁰ su tô igbággé si Abraham katô ikasapulù tun ki Melkisedec, ándà pa kamanubù si Levi na rubbad i Abraham, asal dutun pa ta lawa i Abraham.

¹¹ Na, igbággé ka Manama tô mga sugù ki Moises tingód katô kaparì ka mga rubbad i Levi. Atin ka itanggap tô mga manubù na nángngà tun ta

saruwan ka Manama ukit katô kaparì ka mga rubbad i Levi, ándà pád kailangan na bullasan ka ássa klasi ka kaparì. Asal su ándà dán katanggap na nángngà, duwán iring katô kaparì i Melkisedec na ighbullas kandan. Ánnà sikandin rubbad i Aaron. ¹² Su ighbullasan tô kaparì, ighbullasan pagsik tô mga sugù. ¹³⁻¹⁴ Isóddóran ta na ighbullasan tô tapé mga sugù, su tô Áglangngagán ta ánnà rubbad i Levi, asal rubbad i Juda. Ándà palang rubbad i Juda igimu na pangulu na parì, su ándà kagi i Moises na mému imun na parì tô rubbad i Juda.

Mantu Pangulu na Parì na iring ki Melkisedec

¹⁵ Isóddóran ta na ighbullasan tô kaparì ka mga rubbad i Levi, su duwán dán mantu Pangulu na Parì na iring ki Melkisedec.

¹⁶ Igimu sikandin na Pangulu na Parì ánnà ukit katô mga sugù ka kamónaan din, asal ukit katô matulus kantayan din na ándà ágtamanán. ¹⁷ Mà katô kagi ka Manama na igsulat tingód kandin, “Sikuna tô Pangulu na Parì sippang ka ándà ágtamanán,

iring katô kaparì i Melkisedec sayyan.”†

¹⁸ Purisu isóddóran ta na ighbullasan dán ka Manama tô tapé mga sugù su ándà dán ágpulusán ta kani asta dì makatabang áknita. ¹⁹ Dì ki tanggapán katô Manama na nángngà tun ta saruwan din ukit katô mga sugù. Asal duwán dán mantu kapókit na tuu pa madigár ka tandingán katô tapé, su ukit katô iglumu katô Pangulu na Parì ta, makapadani kid tun ta Manama.

† **7:17** 7:17 Salmo 110:4.

20 Ni mantu kapókit tuu pa madigár ka tandingán katô tapé, su tô igimu tô Manama katô Áglangngagán ta na parì, igsapà sikandin. **21** Tô igimu tô Manama katô mga rubbad i Levi na parì, ándà sikandin sapà. Asal tô igimu sikandin ki Jesus na Pangulu na Parì ta, igsapà tô Manama tingód kandin, su mà katô kagi ka Manama na igsulat,

“Dì gó mapalin tô igtandô katô Áglangngagán kandin:
Sikuna tô Pangulu na Parì sippang ka ándà ágtamanán.”†

22 Purisu si Jesus tô pató na duwán katumanan katô kasabotan na tuu pa madigár.

23 Kailangan marapung tô taganà mga pangulu na parì, su tô tagsábbad-sábbad kandan inaté, asta duwán ágtamanán katô kandan lumu. **24** Asal tuu pa madigár tô pagpangulu i Jesus na parì, su dì gó maté sikandin, asta manayun tô áglumun din ka ándà ágtamanán. **25** Purisu inalayun sikandin makatábbus katô langun na padani tun ta Manama ukit katô kapamaké dan ki Cristo. Su manté sikandin ka ándà ágtamanán, sikandin tô taratapid tun ta Ámmà din para áknita.

26 Purisu nángngà tô kaparì i Jesus na Pangulu na Parì ta. Ugis sikandin. Ándà palang salà din su ándà madat linumuwan din. Ánnà sikandin iring na masalà-salà. Sikandin tô igimu na mallayat tun ta langun, agad tun datas ta langit. **27** Sikandin tô tuu pa madigár ka tandingán katô mga pangulu na parì, su kada álló kailangan matayan dan tô

† **7:21** 7:21 Salmo 110:4.

mga mannanap asta góbbón dan tingód katô salà dan asta salà katô langun Judio. Asal nágngà tô iglumu katô Pangulu na Parì ta, su makasábbad dád sikandin igbággé katô lawa din ébô matayan.

²⁸ Dángngan, tingód katô mga sugù, gimun pangulu na parì tô mga masalà-salà. Asal áknganni, duwán dán igsapà ka Manama na bullas ka mga sugù, su igimu din tô Batà din na Pangulu na Parì ta, asta nágngà dán gó sikandin sippang ka ándà ágtamanán.

8

Si Jesus tô Pangulu na Parì ta

¹ Na, tô punto kani langun na igsulat ku ákniyu, nágngà tô Pangulu na Parì ta. Si Jesus tô iga pónsad katô Manama dadan tun ta kawanan din tun datas ta langit. ² Sikandin tô Pangulu na Parì ta tun ta Tuu Ugis Lugar katô Manama tun datas ta langit. Tô gó é bánnal templo na ándà imuwi ka manubù, asal igimu katô Áglangngagán.

³ Tô langun pangulu na parì, kailangan duwán mga ágbággén dan asta mga ágmatayan dan na bággén tun ta Manama. Purisu kailangan duwán pagsik ágbággén katô Pangulu na Parì ta tun ta Manama. ⁴ Atin ka dini pa ta banuwa tô Pangulu na Parì ta, dì mému ka sikandin tô pangulu na parì, su duwán ássa mga pangulu na parì na ágbággé tun ta Manama tingód katô mga sugù. ⁵ Tô áglumun katô mga pangulu na parì iga péring dád katô áglumun tun datas ta langit. Tô ándà pa patindág si Moises katô tulda na ágsimbaan dan, igsugù tô Manama kandin, na mà din, “Kailangan

imun nu tō langun iring katō igpakita ku áknikó tun ta pabungan.”*

⁶ Asal tō áglumun i Cristo, tō gó tō tuu pa madigár ka tandingán katō iglumu katō mga pangulu na parì ka Judío. Tō mantu kasabotan ka Manama na igtigkanayan i Jesus tuu pa madigár ka tandingán katō tapé kasabotan, su tuu pa madigár tō ighbágge ukit katō mantu kasabotan.

⁷ Atin ka nángngà tō tagnà kasabotan, ándà dán kailangan na bullasan ka ikaduwa. ⁸ Ánnà nángngà tō tagnà su ándà kadayawi tō Manama tingód ka mga manubù. Purisu mà katō kagi ka Manama na igsulat,

“Ikgagi tō Áglangngagán:
Duwán álló na dumunggù na

imun ku tō mantu kasabotan tingód ka langun
manubù, agad tō mga rubbad i Israel
asta tō mga rubbad i Juda.

⁹ Tō mantu kasabotan ánnà iring katō tapé kasabotan ku tun ta mga kamónaan dan tō igpid ku sikandan tikud tun ta Ehipto.

Igéllé dan katō tapé kasabotan.

Purisu igpabayà ku sikandan,
mà katō Áglangngagán.

¹⁰ Iring kani tō mantu kasabotan ku katō mga rubbad i Israel:

Tun ta tapuri álló, igkagi tō Áglangngagán,
Papanámdámmán ku kandan tō mga sugù ku ébô
dì dan kalingawan, asta taguán ku tō mga
sugù ku tun ta pusung dan.

Sakán tō Manama dan,

* ^{8:5} 8:5 Exodus 25:40.

asta sikandan tō kanak mga manubù.

11 Ándà dán kailangan na tuminurù tō manubù ka mga kataladi din na kailangan kasóddóran dan tō tingód katô Áglangngagán, su kasóddóran katô langun manubù tō tingód kanak, agad ágkayù-ayuan dan ó ágkangadanan dan.

12 Agad madat tō iglumu dan, asal pasinsiyaan ku sikandan,

asta dì kud panámdámmán tō mga salà dan.”†

13 Tô igkagi tō Manama na duwán mantu kasabotan, igpasóddór din na tapé dán tō tagnà. Tô tapé asta tō ándà ágpulusán dì dán magamit asta mandà dán.

9

Kapangadap nit banuwa asta dutun ta langit

1 Tun ta tagnà kasabotan ka Manama sayyan, duwán mga sugù din tingód katô kapangadap dan, asta duwán ágsimbaanan dan dini ta banuwa.

2 Tô igimu dan ka simbaan, igimu dan tō tulda na duwán duwa sinabáng. Tô una gahuwan ángadanan na Ugis Lugar katô Manama. Tô gó é igtguan dan katô sulù asta lamisa na ágtguan katô pan na ágbággén tun ta Manama. **3** Duwán ikaduwa sinabáng na isidalungan ka tabir, asta ángadanan yan Tuu Ugis Lugar katô Manama.

4 Duwán bulawan lamisa na ággóbbowan ka pamammut, asta duwán kaban na ángadanan na kaban ka kasabotan, asta igpadákkáttan ka bulawan. Tun dalám katô kaban ka kasabotan igtagu tō

† **8:12** 8:8-12 Jeremias 31:31-34.

bulawan tibud na igtaganan ka pan na ágngadanan mana, tō tukád i Aaron na igséngê, asta tō duwa maluwag batu na igsulatan ka Manama katô mga sugù na ighbágge din ki Moises. ⁵Tun ta bówwó katô kaban duwán duwa igimu panaligan na pató na góddóan ka Manama na ágpasinsiya katô mga salà.* Asal ánnà pa nángngà tō álló ébô mulitta ákniyu tingód katô langun.

⁶Tô igtaganà dan katô langun, kada álló gahu tō mga pangulu na parì tun ta sinabáng dadan ta luwà, su ágtumanán dan tō áglumun dan. ⁷Asal tō sábbad sinabáng tun dalám, tō tuu mallayat dáp pangulu na parì tō mému mahu, asta makasábbad dáp sikandin mahu dalám ka sábbad ámmé. Atin ka gahu sikandin, kailangan piddán din tō dipanug ka mannanap na bággén din tun ta Manama tingód katô kandin salà asta tingód katô salà ka langun kadumaan din. ⁸Ukit katô iglumu dan, igpasóddór katô Ugis Espiritu áknita na róggun igpatindág pa tō tulda, dì mému ka mahu tō manubù tun ta Tuu Ugis Lugar ébô makapadani dan tun ta Manama. ⁹Tô gó é iring na panunggiringan, asta duwán kéringen ta áknganni. Agad pira tō mga mannanap na matayan dan asta bággén tun ta Manama, asal dì kasóddoran katô mga ágpangadap na matanggap dan ka Manama na nángngà tun ta saruhan din. ¹⁰Ánnà nángngà tō mga sugù, su tingód dáp katô áglumun ka manubù

* ^{9:5} 9:5 Tô duwa panaligan igimu tikud tun ta bulawan, asta duwán duwa pakpak dan. Ágbisbisán katô tuu mallayat pangulu na parì tō kaban ka dipanug ka mga mannanap ébô tambunan tō mga salà. Ahaán tō Exodo 25:10-22.

nit banuwa. Duwán sugù tingód ka ágkakan, tingód ka ginámmán, asta tingód katô paglinis ka agad ándin. Tô gó tô kailangan tumanán dan sippang ka pamantun ka Manama tô langun.

Tô dipanug i Cristo

¹¹ Asal igdunggù dán si Cristo, asta igimu dán sikandin na Pangulu na Parì ta. Ukit kandin, madigár tô igdunggù áknita. Tuu pa madigár tô templo na igahuwan din tun datas ta langit. Tô templo tô, ándà imuwi ka manubù, su ánnà nit banuwa. ¹² Ikasábbad dád sikandin igahu tun ta Tuu Ugis Lugar tun datas ta langit, su nángngà dán. Ánnà dipanug ka kambing asta baka tô igpid din tun dalám, asal kandinnù dipanug tô ighbágge din. Ukit katô kamatayan din, igtábbus kid gó ikandin ka ándà ágtamanán. ¹³ Tingód ka mga sugù, atin ka makawid tô manubù ka lawa ka inaté, kailangan taliktilikan sikandin ka dipanug ka kambing ó baka, asta bóbóran ka abu ka iggóbbó nati ka baka ébô kumalinis puman tô lawa din. ¹⁴ Asal tuu pa madigár tô inému ukit katô dipanug i Cristo, su iglinisan kid tikud tun ta salà. Ukit katô Ugis Espiritu na ándà ágtamanán, ighbágge i Cristo tô kandinnù lawa tun ta Manama. Agad ándà palang salà din, asal igmatayan sikandin ébô kalinisan tô pusung ta tikud tun ta salà. Ukit katô dipanug i Cristo, ándà dán ágkailanganán ka kasarig ta tun ta linumuwan ta na ándà ágpulusán, asal igsarig kid tun ta Manama.

Si Cristo tô igtigkané katô mantu kasabotan

15 Purisu si Cristo tō igtigkané katô mantu kasabotan ébô tō langun ta na igsalin ka Manama mému makatanggap katô igtandô din na ándà ágtamanán. Ukit katô kamatayan i Cristo, igtábbus tō mga manubù tikud tun ta salà na inému dan róggun duwán tapé kasabotan.

16 Na, atin ka ágpanalan tō manubù tingód katô kaduwánnan din, pángnga ka maté sikandin, duwán tanggapán katô mga manubù na igpanalanan din. **17** Ándà palang tanggapán dan ka dì pa maté sikandin, su dì mabággé ka manté pô tō tigatun. **18** Purisu tun ta katigkanayan katô tapé kasabotan, kailangan duwán dipanug ka mannanap ébô masarig tō kasabotan. **19** Pángnga ka igtinurù si Moises katô langun sugù ka Manama tun ta mga manubù, igpid din tō dipanug ka baka asta kambing na igmatayan din, asta ibaláttan din ka wayig. Igarám din tō mallutù bulbul ka karnero na igtakós din tun ta panga ka kayu isupu, asta igtaliktik din tō dipanug tun ta libro na igsulatan ka mga sugù, asta tun ta langun manubù. **20** Igkagi si Moises, na mà din, “Ni dipanug katô kasabotan tō pató na duwán dán sugù ka Manama na kailangan tumanán ta.”† **21** Igtaliktik pagsik i Moises tō dipanug tun ta tulda na ágsimbaanan dan asta tun ta langun na ággamitán dan katô kapangadap dan, **22** su tingód katô mga sugù, kailangan duwán dipanug ébô págisán tō karapungan na ággamitán dan. Atin ka ándà matayan ébô duwán dipanug, dì kapasinsiyaan tō duwán salà.

† **9:20** 9:19-20 Ahaán tō Exodo 24:6-8.

Nángngà tō makasábbad kamatayan i Cristo

²³ Tô templo nit banuwa igpéring dáp katô templo tun datas ta langit. Tô dipanug ka mga mannanap tō gamitán ébô págisán tō templo nit banuwa. Asal kailangan tuu pa madigár tō gamitán ébô págisán tō bánnal templo tun datas ta langit. ²⁴ Purisu pángnga inaté si Cristo, ánnà ugis sinabáng na igimu ka mga manubù tō igahuwan din, su igpéring dáp katô Tuu Ugis Lugar tun datas ta langit. Asal igsadun si Cristo tun datas ta langit ébô tumubang ka Manama tingód áknita. ²⁵ Tô pangulu na parì tō gahu tun ta Tuu Ugis Lugar katô templo kada ámmé ébô piddán tō dipanug ka mannanap. Asal si Cristo, ikasábbad dáp gó tō kabággé din katô kandin lawa, su nángngà tō kamatayan din. ²⁶ Atin ka di nángngà, kailangan makapira pô sikandin maté tikud tun ta katigkanayan kani banuwa sippang áknganni. Asal nángngà si Cristo, su ikasábbad dáp tō iglumu din ni ka tapuri álló. Igpamanubù sikandin ébô mangé katô salà ta ukit katô kamatayan katô kandin lawa. ²⁷ Kailangan makasábbad dáp maté tō manubù, asta pángnga ka maté, ruudan katô Manama. ²⁸ Ikasábbad dáp inaté si Cristo ébô mangé katô salà ka langun ta, asta lumónód pa sikandin ánnà ébô kangén puman tō salà ta, asal lumónód ébô kangén din tō langun manubù na tuu maggát gangat kandin.

10

¹ Na, tō mga sugù na ágbánnalán katô mga kamónaan ta, tō dáp gó tō kakilalaan na duwán pa madigár na igtaganà ka Manama para áknita, su tō mga manubù na ágbánnal pád katô mga sugù,

kailangan inalayun dan ágmatayan tō mannanap na bággén tun ta Manama kada ámmé. Agad tō gó é áglumun dan ébô makapadani dan tun ta Manama, asal dì dan tanggapán ka Manama na nángngà tun ta saruhan din ukit katô áglumun dan. ² Atin ka iglinisan dan tikud tun ta salà ukit katô mga mannanap na ágbággén dan tun ta Manama, kasóddóran dan na igpasinsiyaan tō salà, asta mému dan sumódô ka kabággé dan ka mga mannanap. ³ Asal su kailangan inalayun dan mággé ka mannanap, duwán igpasóddór kandan kada ámmé na inalayun duwán salà dan, ⁴ su dì makangé tō salà ka mga manubù ukit katô kabággé dan katô dipanug ka mga baka asta mga kambing.

⁵ Purisu tō masig dán dumunggù si Cristo nit banuwa, igkagi sikandin tun ta Ámmà din, na mà din,

“Ánnà kabággé asta kamaté ka mga mannanap tō nángngà para áknikó.

Purisu duwán lawa na igbággé nu kanak ébô matayanna.

⁶ Dì ka kadayawan ukit katô kagóbbó asta kabággé ka dipanug ka mannanap ébô pasinsiyaan tō mga masalà-salà.

⁷ Igkagiya, ‘Manama, ikataganà ad gó ébô tu-manán ku tō kakalyag nu,
iring na igsulat tingód kanak tun ta libro ka
mga sugù nu.’”*

⁸ Na, tō una igkagi din, dì nángngà tun ta Manama tō kabággé ka manubù ka mga mannanap tun kandin. Agad matayan dan tō mannanap tingód

* **10:7** 10:5-7 Salmo 40:6-8.

katô mga sugù, agad góbbón dan tô mannanap, agad bággén dan tô dipanug ka mannanap tun kandin tingód katô salà dan, asal dì gó kadawayan tô Manama. ⁹ Igkagi pagsik sikandin, na mà din, “Ikataganà ad gó ébô tumanán ku tô kakalyag nu.”

Igpandà dán ka Manama tô una kapókit ébô tigkanayan din tô ikaduwa kapókit. ¹⁰ Su igtuman i Jesu-Cristo tô kakalyag ka Manama, iglinisan kid tikud tun ta salà ukit katô kabággé din katô kandin lawa. Ikasábbad dát gó igmatayan sikandin su nángngà dán ni.

¹¹ Tô langun pangulu na parì, álló-álló ágtindág dan tun ta saruwan ka Manama asta ágmaté dan ka mga mannanap na ágbággén tun ta Manama. Asal dì makangé tô salà ukit katô áglumun dan. ¹² Asal ikasábbad dát inaté si Cristo ébô kangén tô salà ta, asta nángngà ka ándà ágtamanán. Pángnga inanté sikandin, igunsad sikandin dadan tun ta kawanan ka Manama tun datas ta langit. ¹³ Gangat dán sikandin katô álló ka manalu tô Manama katô mga usig din ébô mangulu sikandin tun ta langun. ¹⁴ Purisu ikasábbad dát inaté si Cristo, asta ukit katô kamatayan din, igtanggap kid ka Manama na nángngà tun ta saruwan din ka ándà ágtamanán ukit katô kalinis din áknita tikud tun ta salà.

¹⁵ Duwán pagsik igpasóddór katô Ugis Espiritu áknita, su duwán kagi din na igsulat,

¹⁶ “Igkagi tô Áglangngagán:
Iring kani tô mantu kasabotan ku kandan tun ta tapuri álló.

Papanámdámmán ku kandan tô mga sugù ku,

su sulatán ku ni tun ta pusung dan.”†

¹⁷ Igkagi pagsik sikandin,
“Pasinsiyaan ku tō mga salà dan,
asta diyad manámdám tingód katô madat mga
linumuwan dan.”‡

¹⁸ Purisu ándà dán kailangan ka kamaté ta ka
mannanap, su igpasinsiyaan dán ka Manama tō
mga salà ta.

Makapadani ki tun ta Manama

¹⁹ Purisu mga kataladi, su igbággé dán si Jesus
katô dipanug din tō inaté sikandin para áknita,
ándà dán kayyaan ta ka mahu ki tun ta Tuu
Ugis Lugar katô Manama tun datas ta langit.

²⁰ Ukit katô iglumu i Jesus, duwán dán mantu
ukitanan ta ébô tanggapán ta tō kantayan. Ándà
dán makadalang áknita tun ta Manama, su ukit
katô kamatayan i Jesus igkangé din dán tō tabir
tun ta tángngaan ta asta katô Manama. ²¹ Su si
Jesus tō Mallayat Pangulu na Parì katô langun
ta na mga sakup ka Manama, ²² makapadani kid
tun ta Manama, su mabákkár ni pusung ta na
ágpamaké kandin. Iglisanan dán ni pusung ta asta
ni panámdám ta su iring na igtaliktikan ni katô
dipanug i Jesus asta iglinisan dán ni lawa ta ka
wayig ka kapabunyag. ²³ Kailangan manayun
ki giman katô igtandô ka Manama na ágpamakén
ta, su ágkasarigan sikandin ágtuman katô langun
tandô din. ²⁴ Kailangan patabangé ki ébô pagi-
nawaé ki asta lumumu ki ka madigár. ²⁵ Yakó
ágsódô ágpangadap, iring katô duma mga manubù,

† **10:16** 10:16 Jeremias 31:33. ‡ **10:17** 10:17 Jeremias 31:34.

asal kailangan palimudé kó ébô tuu ki pabákkárré ka ginawa asta ébô makatiis ki, su isóddóran ta na dì madugé dumunggù tō álló na lumónód tō Áglangngagán.

²⁶ Atin ka isóddóran tad tō kabánnalan asal in-alayun ki pa áglumu ka madat, ándà dán ássa maté ébô kapasinsiyaan tō salà ta. ²⁷ Tō manubù na áglumu ka salà ágpadunggù dád man katô supak na makamáddang asta katô dakál apuy na igtaganà ka Manama para katô mga usig din. ²⁸ Atin ka duwán méllé katô sugù i Moises sayyan, ka duwán tallu manubù ó duwa na tumestigos ka bánnal, dì sikandin kéduwan, asal matayan. ²⁹ Tuu pa madat tō supak na dumunggù tun ta manubù na géllé katô Batà ka Manama, su ukit katô kélé din, pasóddórán din na ándà ágpulusán din katô dipanug i Jesus na makalinis pád kandin, agad tō gó é kakilalaan ka duwán dán kasabotan ka Manama. Supakan sikandin su igringasa din tō Ugis Espiritu na ágkéduwan áknita. ³⁰ Isóddóran ta na Manama tō igkagi kani,
“Sakán tō sumupak kandan.
Sakán tō sumulì kandan.”

Igkagi pagsik,

“Rumuud tō Áglangngagán katô mga sakup din.”[§]
³¹ Makamáddang gó ka tō manté Manama tō sumupak.

³² Sampát yu tō tingód ka katigkanayan ka kapamaké yu dángngan. Tō ikasóddór kó katô kabánnalan tikud tun ta Manama, marapung tō kahirapan na igdunggù ákniyu, asal ikatiis kó katô

langun. ³³ Duwán timpo na igaipayayyaan kó asta igirrayatan kó tun ta tubang ka mga manubù, asta duwán timpo na ikatabang kó katô duma mga manubù na igirrayatan. ³⁴ Duwán kédu yu katô duma mga manubù na igpriso, asta igtabang kó kandan. Agad ikangé tô langun kaduwánnan yu, asal ágkadayawan kó gó, su isóddóran yu na tuu pa madigár tô pulusán yu ka tandingán katô ikangé, asta dì gó ni makangé tikud tun ákniyu. ³⁵ Purisu yakó ágsungkù ka kasarig yu tun ta Manama, su atin ka mabákkár tô kasarig yu kandin, dakál tô pulusán na tanggapán yu. ³⁶ Kailangan mallayat tô ginawa yu ébô makatumán kó katô kakalyag ka Manama, asta tanggapán yu tô igtandô din ákniyu. ³⁷ Mà katô kagi ka Manama na igsulat, “Masig dán gó dumunggù tô gimanán yu. Dì sikandin ágbaring-baring.

³⁸ Asal tô mga manubù na ágtanggapán ku na nángngå dan tun ta saruhan ku, tô gó é makatiis, agad ándin tô kahirapan tingód katô kasarig dan kanak.

Asal ka sumungkù tô manubù na mákkás kanak tingód katô kataló din, diya kadawayan kandin.”*

³⁹ Asal sikita ánnà iring katô talón na supakan ka Manama, su mabákkár tô kapamaké ta kandin. Purisu matábbus ki.

11

Marapung tô mga igaipamaké ka Manama

* **10:38** 10:37-38 Habacuc 2:3-4.

1 Na, atin ka mamaké ki katô Manama, kasóddoran ta na matuman na makatanggap ki katô madigár gimanan ta, asta kasóddoran ta na duwán gó madigár na mému agad ándà ta pa kitayi. **2** Igdurung katô Manama tô mga kamónaan ta sayyan tingód katô kapamaké dan kandin.

3 Ukit ka kapamaké ta ka Manama, isóddoran ta na igimu din ni banuwa ukit dád katô kagi din. Dì ágkitanán tô iggamit din tô igimu din tô langun na ágkitanán ta.

4 Ukit ka kapamaké i Abel ka Manama sayyan, ighbágge din tun ta Manama tô tuu nángngá ka tandingán katô ighbágge katô kataladi din na si Cain. Ukit ka kapamaké i Abel katô Manama, igtanggap ka Manama sikandin na nángngá tun ta saruhan din. Igpasóddór ka Manama na nángngá si Abel tun ta saruhan din ukit katô katanggap din katô ighbágge din. Agad idugé dán si Abel inaté, asal duwán pa kéringen ta tun kandin tingód katô kapamaké din ka Manama.*

5 Ukit ka kapamaké i Enoc ka Manama, ándà sikandin kamaté, su igbatun ka Manama sikandin tun ta langit. Pángnga igbatun ka Manama sikandin, ándà kitayi, su igbatun ka Manama. Duwán kagi ka Manama na igsulat tingód ki Enoc. Róggun na ándà pa sikandin kabatun, idayawan tô Manama tingód kandin. **6** Dì kadayawan tô Manama áknita ka dì ki mamaké kandin. Atin ka padani tô manubù tun ta Manama, kailangan manámdám sikandin na duwán Manama, asta

* **11:4** 11:4 Ahaán tô Genesis 4:3-10.

duwán ágpulusán na bággén ka Manama tun ta langun manubù na padani tun kandin.

⁷ Ukit ka kapamaké i Noe ka Manama, igpasóddór ka Manama kandin na duwán dumunggù na makapánnas ka mga manubù. Agad ándà pa kitayi i Noe tô makapánnas, asal igbánnal sikandin ka Manama, asta igimu din tô dakál barko na ánggadanan arka. Tô gó é igsakayan din asta katô pamilya din. Tô iglunupan ni banuwa, ándà dan kalánnád. Ukit katô kapamaké i Noe katô Manama, igpasóddór din na nángngà tô supak ka Manama katô mga manubù na ándà pamaké kandin. Igtanggap ka Manama si Noe na nángngà tun ta saruhan din ukit katô kapamaké din ka Manama.†

⁸ Ukit ka kapamaké i Abraham ka Manama, tô igtawar tô Manama kandin, igbánnal sikandin. Agad ándà din kasóddóri ka ánda é sadunan din, asal igpanó sikandin tikud tun ta lunsud na igóddóan din asta igsadun tun ta lugar na igtandô ka Manama kandin. ⁹ Ukit ka kapamaké i Abraham ka Manama, igóddô sikandin iring na bisita tun ta banuwa na igtandô ka Manama kandin. Ándà balé na igimu din asal igóddô dát sikandin tun ta tulda na iring katô igóddóan katô batà din na si Isaac, asta katô apù din na si Jacob, su magunawa pagsik tô igtandô ka Manama kandan.‡ ¹⁰ Iring na bisita si Abraham, su giman sikandin katô góddóan din tun datas ta langit na dì gó mapalin su igimu ka Manama.

† **11:7** 11:7 Ahaán tô Genesis 6:13-22. ‡ **11:9** 11:8-9 Ahaán tô Genesis 12:1-8.

11 Ukit ka kapamaké i Sara, agad dì sikandin ágbatà asta tugál dán, ikabatà sikandin, su isóddoran din na ágkasarigan tò Manama na igtandô. § **12** Agad ándà gimanan i Abraham na makabatà pa su tugál dán, asal sikandin tò igtikudan katô marapung mga rubbad din iring katô karapungan ka mga karani tun ta langit, asta iring katô baklayan tun ta ligad ka dagat na dì ágkéyap.*

13 Tò langun dan na igpamaké ka Manama, tò inaté sikandan, ándà dan pa katanggap tò igtandô ka Manama. Agad madugé pa tò katumanan, asal iring na igkita dan asta idayawan dan. Igpasóddór dan na ánnà nit banuwa tò góddóan dan na ándà ágtamanán. **14** Atin ka ágkagi tò mga manubù na ánnà nit banuwa tò góddóan dan, kasóddoran ta na duwán pa ássa góddóan na gimanan dan. **15** Ándà panámdám tò mga kamónaan ta sayyan na kandan tò banuwa na igtikudan dan, su atin ka tò gó é panámdám dan, makému dan lumónód dutun. **16** Asal gimanan dan tò góddóan na tuu pa madigár, tò banuwa tun datas ta langit. Purisu ándà kayyai tò Manama ka ágtawarán sikandin na Manama dan, asta igpataganà din dán tò lunsud para kandan.

17-18 Ukit ka kapamaké i Abraham, tò igkinnam tò Manama kandin, ignunug sikandin katô sugù ka Manama na matayan din tò kandin batà na si Isaac asta góbbón ébô bággen tun ta Manama. Agad igtandóan ka Manama si Abraham na ukit ki Isaac

§ **11:11** 11:11 Ahaán tò Genesis 17:19; 18:11-14; 21:2. * **11:12**
11:12 Ahaán tò Genesis 15:5-6.

kumarapung tō mga rubbad din, asal ikataganà si Abraham na matayan din tō bugtung batà din ébô bággén tun ta Manama.[†] **19** Igbánnal si Abraham ka Manama, su panámdám din na makému tō Manama manté puman ka mga inaté. Purisu iring na iganté puman katô Manama si Isaac asta igpólì ki Abraham.

20 Ukit ka kapamaké i Isaac katô Manama, igtandô sikandin katô gabatà din na si Jacob asta si Esau na madigár tō bággén ka Manama kandan.[‡]

21 Ukit ka kapamaké i Jacob katô Manama, tō masig dán sikandin maté, igkagi sikandin tingód katô duwa apù din na gabatà i Jose na madigár tō bággén ka Manama kandan. Róggun na igunduk sikandin tun ta tukád din, igpangadap sikandin katô Manama.[§]

22 Ukit ka kapamaké i Jose katô Manama, tō masig dán sikandin maté, igkagi sikandin na dumunggù tō álló na panó tō langun rubbad i Israel tikud tun ta Ehipto, asta duwán panalan din na piddán dan tō mga tullan din ka manó dan.*

23 Ukit ka kapamaké katô ámmà asta innà i Moises katô Manama, ándà máddang dan ka sugù katô harì ka Ehipto, asal igállás dan si Moises sippang ka tállu bulan ébô dì kamatayan, su igkita dan na madigár sikandin.[†]

24 Ukit ka kapamaké i Moises ka Manama, tō igdakál sikandin, dì malyag na tawarán na apù

† **11:17-18** 11:17-18 Ahaán tō Genesis 22:1-10. ‡ **11:20** 11:20

Ahaán tō Genesis 27:27-29,39-40. § **11:21** 11:21 Ahaán tō Genesis

47:31,48. * **11:22** 11:22 Ahaán tō Genesis 50:24-25. † **11:23**

11:23 Ahaán tō Exodo 1:22; 2:2.

katô harì,‡ 25 su igpanámdám sikandin na agad irrayatan sikandin duma katô mga sakup ka Manama, asal tuu pa madigár ka tandingán katô kadayawan ukit ka salà tun ta mabbabà däd timpo. 26 Igpanámdám sikandin na agad buyasán asta kayyaan sikandin tingód ka kapamaké din katô Mesiyas, asal tuu pa madigár ka tandingán katô dakál kaduwánnan din tun ta Ehipto. Tô gó é igsalin din su gimanan din tô pulusán na bággén ka Manama kandin. 27 Ukit ka kapamaké din ka Manama, igpanó sikandin tikud tun ta Ehipto. Ándà máddang din katô sókó katô harì. Igpabákkár sikandin su iring na ágkitanán din tô Manama na dì ágkakita.§ 28 Ukit ka kapamaké i Moises ka Manama, igkagi sikandin na kailangan matayan dan tô karnero asta pólétán tô dipanug tun ta sállat ka balé dan ébô dì matayan tô tambang kaké katô mga gabatà ka Hebreo ka papiddán ka Manama tô Panaligan na Ágmaté.*

29 Ukit ka kapamaké dan ka Manama, ikatal-ipag dan tun ta Dagat Mallutù asta igpanó dan tun ta matákkang tanà. Asal tô mga taga Ehipto na iglupug kandan, tô igkinnam dan na ágtalipag, ilánnadô langun asta inaté.†

30 Ukit ka kapamaké katô mga Hebreo ka Manama, iglibut dan tun ta mallayat koral ka lunsud ka Jerico sippang ka ikapittu álló, asta igbantang

‡ 11:24 11:24 Apù katô harì, ó batà katô prinsesa na batà katô harì tun ta Ehipto. Ahaán tô Exodus 2:10. § 11:27 11:27 Ahaán tô Exodus 2:15. * 11:28 11:28 Ahaán tô Exodus 12:21-30. † 11:29 11:29 Ahaán tô Exodus 14:21-31.

ka Manama tō mallayat koral.[‡] ³¹ Si Rahab na madat bayi, ukit ka kapamaké din ka Manama, madigár tō katanggap din katô duwa espiya na igpasadun i Josue, asta ándà sikandin matayi tákkás katô mga taga Jerico na ándà bánnal ka Manama.[§]

³² Dakál pa tō kagin ku pád ákniyu tingód katô mga manubù na iga pamaké ka Manama, asal ánnà nángngà tō álló ébô mulitta ákniyu tingód ki Gideon, ki Barak, ki Samson, ki Jepte, ki David, ki Samuel, asta katô duma mga propeta ka Manama sayyan.*
³³ Ukit katô kapamaké dan ka Manama, duwán mga manubù na ikatalu ka mga harì na igusig kandan. Duwán mga igbánnal ka Manama asta igtanggap dan tō igtandô din kandan. Duwán mga iga pagtangkáb ka babbà ka mga liyun na kumagat pád kandan. ³⁴ Duwán mga ikapadáng ka dakál apuy. Duwán mga ikaluwà tikud tun ta bállad ka mga manubù na mimmaté pád kandan. Duwán mga malómét na inému mabákkár. Duwán magani na igatu ka mga usig dan, asta igpanalu dan katô mga igsulung kandan tikud tun ta ássa banuwa.[†]

³⁵ Duwán pagsik mga gabayi na iga pamaké ka Manama, asta inanté puman tō kandan mga gabatà na inaté. Duwán mga duma na iga pamaké ka Manama na igirrayatan sippang na inaté, asal ándà dan tanan katô kapamaké dan agad makaluwà dan pád, su isóddóran dan na

[‡] **11:30** 11:30 Ahaán tō Josue 6:12-21. [§] **11:31** 11:31 Ahaán

tō Josue 2:1-21; 6:22-25. ^{*} **11:32** 11:32 Ahaán tō Maghuhukom kapitulo 6-8; 4-5; 13-16; 1 Samuel kapitulo 16-30; 2 Samuel kapitulo 1-24; 1 Mga Harì kapitulo 1-2; 11; 1 Samuel kapitulo 1-12; 15; 16:1-13.

[†] **11:34** 11:33-34 Ahaán tō Daniel kapitulo 3 asta 6.

dumunggù tō álló na antén dan ka Manama asta matanggap dan tō tuu madigár kantayan.[‡]

³⁶ Duwán igpamaké ka Manama na ihirapan su ighbuyas-buyas asta iglagpás. Tō mga duma igbagkás ka kadina, asta igpriso. ³⁷ Duwán mga duma na igtimbag ka batu ébô maté. Iggabas tō lawa katô mga duma, asta igmatayan tō mga duma ukit ka kampilan. Igpanó-panó tō duma mga manubù na igumpak ka kindal ka karnero asta kambing su ándà ássa umpak dan. Ágkayù-ayuan dan, igpahirapan dan, asta igirrayatan dan.

³⁸ Igpapalaguy dan tun ta disyerto asta tun ta pabunganán, asta igóddô dan tun ta mga takub asta tun ta kóbbang ka tanà. Agad madigár dan mga manubù, asal ándà dan respetowi ka duma mga manubù nit banuwa.

³⁹ Agad igdurung ka Manama tō langun dan tingód ka kapamaké dan kandin, asal ándà dan pa ikatanggap katô igtandô ka Manama, ⁴⁰ su duwán ágdantulán din na tuu pa madigár para áknita langun ka tandingán kandan, su kakalyag ka Manama na masakup ki tun kandan ébô makatanggap ki katô madigár na igtandô din.

12

Ágdisiplinan ka Manama tō langun gabatà din

¹ Na, tuu marapung tō mga manubù na igpamaké ka Manama sayyan, asta ágpasóddór dan áknita na tuu ágkasarigan tō Manama. Purisu

[‡] **11:35** 11:35 Ahaán tō 1 Mga Harì 17:17-24; 2 Mga Harì 4:25-37.

kailangan tumanan ki katô langun na makabar-ing áknita iring na ágpatónaé ágpalaguy. Kailangan sumódô ki lumumu ka salà na inalayun pakékát áknita. Kailangan mallayat tô ginawa ta róggun na malaguy ki sippang ka dumunggù ki tun ta ágtamanán. ² Kailangan sumállág ki ki Jesus su sikandin tô ágkérigan ta katô kapamaké ta, asta sikandin tô ágpabákkár katô kapamaké ta. Ikatii si Jesus katô kahirapan tô igpansalan sikandin tun ta krus. Ándà kayyai sikandin katô igimu dan kandin, asal ikiatiis sikandin katô kamaté dan kandin, su isóddóran din na kadayawan sikandin ka mapángnga tô langun. Gunsad dán sikandin dadan tun ta kawanan katô Ámmà din na Manama asta ágpangulu duma kandin.

³ Tuu madat tô kahirapan na igitii si Jesus, su igir-rayatan katô mga manubù na masalà-salà. Purisu panámdám kó tingód kandin ébô dì kó sumódô summarig kandin. ⁴ Agad gusigán kó katô mga masalà-salà, ándà pa palang manubù tun ákniyu na igmatayan. ⁵ Iring na ilingawan yud tô kagi ka Manama tun ta langun yu na mga gabatà din, su mà katô igsulat,

“Batà ku, atin ka disiplinan ka katô Áglangngagán,
yaka ágpadannan kandin.

Atin ka supakan ka ikandin,
yaka ágsódô ágsarig kandin,

⁶ su ágdisiplinan katô Áglangngagán tô langun na
ágginaawaan din,
asta ágsupakan din tô langun na igimu din mga
gabatà din.”*

* **12:6** 12:5-6 Mga Panultihon 3:11-12.

⁷ Purisu ka dungguan kó ka kahirapan, kailangan manayun kó tumiis, su disiplinan kó ka Manama ukit katô kahirapan. Atin ka disiplinan kó ikandin, tô gó é pató na sikiyu tô bánnal mga gabatà din, su ándà palang batà na dì disiplinan ka ámmà din. ⁸ Ágdisiplinan ka Manama tô langun yu na igpasakup tun kandin. Atin ka dì kó ikandin disiplinan ánnà kó bánnal mga gabatà din asta ánnà sikandin Ámmà yu. ⁹ Agad igdisiplina ki katô áknita mga ámmà nit banuwa, ágrespetowan ta sikandan. Purisu tuu pa madigár ka dì ki géllé katô kadisiplina katô Ámmà ta tun datas ta langit ébô makatanggap ki katô kantayan na ándà ágtamanán. ¹⁰ Tô mga ámmà ta nit banuwa, tô gó é ágdisiplina áknita tun ta mabbabà dáp timpo tingód ka agad ándin na igpanámdám dan na madigár. Asal tô Ámmà ta tun datas ta langit, tô gó é ágdisiplina áknita ébô tabangan ki ikandin asta ébô tanggapán ki ikandin na nágngà ki tun ta saruhan din. ¹¹ Atin ka ágdisiplinan ki katô Manama, dì ki ágkadayawan asal ágkarunu ki su mahirap tô pókitan din áknita. Asal pángnga katô kadisiplina din áknita, duwán pulusán ta, su masunay tô pusung ta, asta katig ki lumumu katô nágngà tun ta saruhan din.

Supakan tô dì maminág ka kagi ka Manama

¹² Purisu yakó ágmalomét iring na ágpatónaé ágpalaguy. Agad ihirapan kó, yakó ágsódô, asal kailangan pabákkár kó asta pabákkárrán yu tô kasarig yu katô Manama. ¹³ Yakó ágsuwé tikud tun ta dalan ka kabánnalan ébô kumabákkár tô mga kadumaan yu na malómét é kasarig tun ta Manama.

14 Ággár-ággár kó pasábbadé asta tô langun manubù. Ággár-ággár kó lumu katô nángngà tun ta saruhan ka Manama, su tô manubù na dì nángngà tun ta saruhan ka Manama dì gó kumita katô Áglangngagán. **15** Banté kó agó duwán dì makatanggap katô kédu ka Manama. Banté kó agó duwán mimu ka samuk tun ákniyu, su ukit kani, kadattan tô marapung manubù. **16** Banté kó agó duwán lumayuk katô ánnà kandin sawa ó duma, asta tumayyug ka Manama. Makéring dan ki Esau sayyan, su agad sikandin tô panganayan batà na makatanggap pád katô langun tikud tun ta ámmà din, igbullas din dákál ka sábbad kakan. **17** Isóddóran yu na pángnga igbullas din, kakalyag din na bággayan sikandin ka langun, asal igéllé tô ámmà din. Dì mapalin tô iglumu din, agad tuu igsággó sikandin asta igpédu-édu.†

18 Tô igpadani kó tun ta Manama, ánnà iring katô kapadani katô mga kamónaan ta tun ta pabungan ka Sinai, su igkita dan tô dakál apuy, tô kangiittángngan na makamáddang, asta igriyu dan tô mabákkár karamag. **19** Igdinág dan tô kédup ka trumpeta asta tô kagi ka Manama. Tô igdinág dan katô kagi din, tuu dan imáddangan, asta igpédu-édu dan na dì sikandin kumagi kandan. **20** Ándà dan ikatiis katô igkagi din kandan, na mà din, “Agad manubù asta mannanap, ka lumapas dan tun ta pabungan, kailangan timbagán dan ka batu ó panaán dan ébô maté.”‡ **21** Tuu dan imáddangan tingód katô igkita dan, agad si Moises igkagi na

† **12:17** 12:16-17 Ahaán tô Genesis 25:29-34; 27:30-40. ‡ **12:20**
12:20 Ahaán tô Exodo 19:12-13.

igkárkár sikandin ka máddang din. §

²² Asal ánnà iring kanan tō kapadani ta tun ta Manama, su iring na igpadani kid tun ta pabungan na ágngadanan Sion, tō lunsud na góddóan ka manté Manama. Tō gó é lunsud tun datas ta langit na ágngadanan Mantu Jerusalem na ágkalimudan ka tuu marapung panaligan ka Manama na dì ágkéyap. ²³ Isakup kid duma katô mga gabatà ka Manama na iring katô tambang kaké din. Igsulat tō ngadan dan tun datas ta langit. Igpadani kid tun ta Manama na rumuud ka langun, su igsakup ki ikandin tun ta langun duma mga sakup din na inaté dán asta igtanggap din sikandan na nángngà tun ta saruhan din tun datas ta langit. ²⁴ Igpadani kid tun ki Jesus na igtigkané katô mantu kasabotan ébô makapadani ki tun ta Manama. Iglinisan kid katô dipanug din tikud tun ta salà, asta tō gó é pató na duwán kédu ka Manama áknita. Tō igpasóddór ukit katô dipanug i Jesus tuu pa madigár ka tandingán katô dipanug i Abel.

²⁵ Na, yakó géllé katô kagi ka Manama. Igsupakan ka Manama tō mga kamónaan ta sayyan su igéllé dan katô kagi ka Manama na igulit i Moises nit banuwa. Atin ka méllé ki katô igkagi ka Manama tikud tun ta langit, tuu ki ikandin supakan. ²⁶ Tō igkagi tō Manama tun ta pabungan ka Sinai sayyan, ikálláng tō tanà ukit katô kabákkárran ka kagi din. Asal duwán pa igtandô din, na mà din, “Makasábbadda pa kumagi, asta ánnà dád tanà tō kállángngán ku, su kállángngán ku pagsik tō langit.”* ²⁷ Ukit kani igkagi ka Manama, isóddóran

§ **12:21** 12:21 Ahaán tō Deuteronomio 9:19. * **12:26** 12:26
Hageo 2:6.

ta na kállángngán din tô langun na igimu din asta iwaán din ébô masamà dád tô dì ágkakálláng.

²⁸ Purisu kailangan pasalamat ki tun ta Manama su igsakup kid ikandin tun ta pagpangulu din tun ta langit na dì ágkéwà. Kailangan mangadap ki kandin magunawa katô kakalyag din na lumun ta, asta tuu ki rumespeto kandin, ²⁹ su tô Manama na ágpangadapán ta iring na apuy na pakagóbbó.†

13

Kapangadap na makabággé ka dayó tun ta Manama

¹ Kailangan panayunán yu tô dakál ginawa tun ta mga kataladi yu. ² Yakó ágkalingó na kailangan malit-alit kó katô mga manubù agad ándà yu kilalayi, su duwán mga manubù na igalit-alit katô mga panaligan ka Manama na igádding tun kandan, asal ándà dan kasóddóri.* ³ Yakó ágkalingó na kailangan tumabang kó katô mga ágpampamaké na igpriso iring na sikiyu tô igpriso duma kandan. Kailangan tumabang kó katô mga ágpampamaké na igirrayatan iring na sikiyu tô igirrayatan duma kandan.

⁴ Kailangan manámdám tô langun na madigár asta malinis tô ágkémun katô taladuma. Kailangan ándà lumibug, su supakan ka Manama tô lumibug asta lumayuk katô ánnà kandin sawa ó duma.

⁵ Yakó ágginawa ka salapì, asal kailangan kanángngaan kó katô kaduwánnan yu áknganni, su igkagi tô Manama, na mà din, “Diya tumanan

† **12:29** 12:29 Ahaán tô Deuteronomio 4:24. * **13:2** 13:2 Ahaán tô Genesis 18:1-8; 19:1-3.

ákniyu. Diya dumiyà ákniyu.”† **6** Purisu dì ki kamáddangan, asal makakagi ki, na mà ta,
“Su Áglangngagán tō ágtabang kanak,
 diya kamáddangan,
 agad ándin tō lumun ka duma manubù
 kanak.”‡

7 Sampát yu tō mga tarapid ka simbaan na iginurù ákniyu ka kagi ka Manama dángngan. Panámdám kó tingód katô madigár linumuwan dan tō ándà dan pa kamaté, asta iring kó kandan.

8 Si Jesu-Cristo dì ágkapalin agad sayyan, áknganni, asta tun ta ándà ágtamanán. **9** Atin ka duwán tuminurù ákniyu ka ássa klasi ka katinurù na ánnà iring katô kabánnalan na taganà iginurù ákniyu, yakó ágbánnal kandan. Ukit katô tabang ka Manama, kumabákkár tō kasarig ta kandin. Dì kumabákkár tō kasarig ta kandin ukit katô katuman ta katô mga sugù na ágtinuruán dan tingód katô makan ta, su dì ágkatabangan tō mga ágtuman katô mga sugù ka Judío.

10 Inaté si Jesus ébô tábbusán din tikud tun ta salà tō langun ta na igpamaké kandin. Asal tō langun na ágtuman katô sugù tingód ka kamaté ka mannanap tun ta templo, dì dan makapil katô langun ta na igtábbus i Jesus tikud tun ta salà. **11** Kada ámmé ka matayan ka mallayat pangulu na parì tō mannanap tingód katô salà ka manubù, piddán din tō dipanug tun dalám katô Tuu Ugis Lugar ka templo. Asal piddán din tō lawa katô mannanap tun ta luwà katô lunsud asta góbbón.§ **12** Iring

† **13:5** 13:5 Deuteronomio 31:6,8. ‡ **13:6** 13:6 Salmo 118:6.

§ **13:11** 13:11 Ahaán tō Levitico 16:27.

kani tō inému ki Jesus, su igmatayan sikandin tun ta luwà katô lunsud ébô linisan din tō mga manubù ukit katô kandin dipanug. ¹³ Purisu kailangan madun ki tun ki Jesus na inaté tun ta luwà katô lunsud agad buyasán ki asta payayyaán ki iring kandin. ¹⁴ Makatiis ki su nit banuwa ni ándà palang góddóan ta na ándà ágtamanán. Asal gimanan ta pa tō lunsud na óddóan ta tun datas ta langit ka tapuri álló. ¹⁵ Purisu kailangan duwán dán bággén ta tun ta Manama ukit ki Jesus, tō gó kadurung ta katô Manama ka ándà ágtamanán. Kailangan inalayun ki ágpasalamat tun kandin. ¹⁶ Yakó ágkalingó na kailangan madigár tō áglumun yu, asta kailangan tumabang kó katô mga kadumaan yu na ágkahirapan, su atin ka tō gó é áglumun yu para katô Manama, kadayawan sikandin.

¹⁷ Bánnal kó katô mga tarapid ka simbaan. Yakó gélle kandan, su ágtómmóngan kó ikandan. Kailangan ágkasarigan sikandan, su duwán álló na ruudan dan ka Manama. Atin ka mánnal kó kandan, kadayawan dan. Asal ka dì kó mánnal kandan, maranu dan, asta dì ni makabággé ka kadigárran ákniyu.

¹⁸ Inalayun kó dasal tun ta Manama para áknami. Isóddóran dé na ándà linumuwan dé na mému buyasán, asta kakalyag dé na ándà palang lumun dé na dì durungán ka Manama. ¹⁹ Kakalyag ku gó na dumasał kó tun ta Manama ébô sékóttá makalónód tun ákniyu.

Tô kadasal

²⁰⁻²¹ Manama tō ágbággé ka kasunayan, asta mólà pa ka bággayan kó ikandin katô langun

madigár tabang din ébô makatuman kó katô kakalyag din. Iganté puman ka Manama tô Áglangngagán ta na si Jesus, su ukit katô kamatayan din, igtigkanayan din tô mantu kasabotan ébô makapadani ki tun ta Manama ka ándà ágtamanán. Iring sikandin na Taradóppón ta, su iring ki na mga karnero na ágdóppónan din. Mólà pa ka tabangan kó ikandin ébô makabággé kó ka dayó kandin ukit katô tabang i Jesu-Cristo ákniyu. Mólà pa ka durungán sikandin ka ándà ágtamanán. Matuman ni.

Katapuriyan mga panalan

22 Mga kataladi, ágpédu-éduwa na tuu kó mamínág kani mga tinurù ku, su mabbabà dád ni sulat ku ákniyu. **23** Kakalyag ku na kasóddóran yu na igpaluwà dán tô kataladi ta na si Timoteo tikud tun ta prisowan. Atin ka sékót sikandin dumunggù, patákkássán ku sikandin ka madunna tun ákniyu.

24 Uliti yu tô mga tarapid ka simbaan asta tô langun sakup ka Manama na ágpangumusta a kandan. Ágpangumusta pagsik ákniyu tô mga taga Italia.

25 Mólà pa ka kéduwan tô Manama ákniyu langun. Matuman ni.

**Kagi Ka Manama
New Testament and Shorter Old Testament in
Tagabawa**

copyright © 2004 Wycliffe Bible Translators, Inc.

Language: Tagabawa

Translation by: Wycliffe Bible Translators, Inc.

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

New Testament and Shorter Old Testament

in Tagabawa

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 11 Nov 2022 from source files
dated 29 Jan 2022

bb1b22b0-020d-5555-b0e4-517943a1ed25